

Reflexiuns durant pachetar

■ **Chartuns, chistas ed ina chascha d'utensils. Bindel da tatgar, in fieuter nair ed ina forsk. Tut quai èn utensils che ma gidan da midar chasa. Dad in lieu plain memorias ad in lieu, nua che las memorias vegnan anc creadas.**

Creadas cun nova glied, novs collegas en ina nova abitaziun ed ina nova citad, numnadamain Turitg.

Bandunar mes dachasa en Surselva n'è betg simpel per mai. Jau vom ad abitar en ina abitaziun che jau vegn a numnar mes nov dachasa, mes nov dachasa che ma n'è

anc betg enconuschent. La nova part da mia vita entschaiv jau en sasez cun tut quai che jau n'enconusch enfin qua anc betg.

Bleras notgs giascheva jau alerta en mes letg e m'hai fatg patratgs davart mes futur. Co vegn mes futur a sa preschentar, tgi ma vegn ad esser impurtant e tgi vegn jau mezza insumma ad esser?

Dumondas e dumondas, a las qualas jau na poss betg dar ina resposta. La singula via da scuvrir tge ch'il futur ma vegn a purtar è da simplamain viver la vita e

guardar tge che capita. Gea, jau sai che quai tuna banal, ma quai è la verdad. Per esser sincera m'ha quest pensament quietà. La tema è svanida, ma tge tema è gist svanida? La tema d'esser persula, da l'avegnir u da tut quai che jau n'enconusch enfin qua betg anc?

La tema d'esser persula è anc qua. Ma betg l'esser suletta, mabain l'esser tranter glied e nagin s'accorscha ch'ins è gist dasperas, ins è pia aria per ils auters concarstgauns. Igl è la tema da l'exclusiun, dal tschertgar infinit da contact e dal ve-

gnir renviada. Questa sort d'esser suletta è mendra che l'esser suletta en abitaziun la saira ed udir persunas alcoholisadas sin via suenter mesanotg chantond dad aut la chanzun «We Are the Champions» da Queen. Gea, vus essas vairamain campions, però campions che fan ina canera disturbanta che engola mia sien. Jau hai era tema da l'encreschadetgna che jau vegn ad avoir. Dal laschar encrescher per mes collegas e per mia famiglia. Encreschadetgna per memorias gia passadas. I tanscha! Avunda da questa reflexiun!

Quant spert ch'ins po far or d'in pilesch in chaval. Ma ussa anavos a l'essenzial. Il davos chartun è pachetà e serrà cun bindel da tatgar. Cun il fieuter nair etichettesch jau il chartun cun il num «Chausas attaschadas cun memorias». Cura che jau hai finì l'etichetta era jau pinada per la midada da mes dachasa, per la encreschadetgna e pinada per las novas memorias. Cun memorias veglias, in bun sentiment e curaschi vom jau en ina nova part da mia vita, mes futur.

Svenja Kaib